

KUMPUAN
RAM LEH HNAM
HUMHALH

YMA AW



CHANMARI WEST BRANCH YMA CHANCHINBU KARTIN CHHUAK. VOL. XXIV. ISSUE NO. 28 14th July 2013

Chanmari-Chaltlang Kawnga In Sak Enfiah a ni

Branch News

Chanmari West, 14th July, 2013 : Pu David Lalhmangaiha, Chanmari, Chaltlang Road-a mi in sak (extend) mek chu a thlang lam, Chanmari West veng tana him lo nia Branch YMA-in a hriat avangin June ni 3 khan Aizawl Municipal Council (AMC)-ah hma la turin ziakin a thlen.

June ni 5 khan AMC aţangin Pu David Lalhmangaiha hnenah a insak chhunzawm tawh lo tura hriattirna lehkhah an pek copy chu Branch YMA pawhin a dawng a, an hmalakna lawmawm a ti hle.

Pu David-a hi AMC -in a insak chhunzawm lo tura an hriattir chung pawhin a sak chhunzawm reng avangin Branch YMA chhuan AMC lamah an phalna la a chhunzawm nge a nih ? A zawt zui a, phalna la chuang lovin ama thuin a chhunzawm tih finfiah a ni.

AMC phalna la lova hna a chhunzawm reng lai hian thuneitute'n a chungah hma an la si lo va, Branch YMA chuan July ni 10 (Nilaini) khan Aizawl Deputy Commissioner & Chairman, Aizawl Disaster Management Authority hnenah a rang lama hma la tura ngenna lehkhain a theh lut.

He lehkhah theh luhah hian AMC-in sak chhunzawm lo tura an hriattirna lehkhah xerox copy leh hnathawklai thlalak thil tel a ni bawh. Hemi tlai dar 4:00 hian Aizawl DC chuan enfiah turin Dr Lalngura Tlau (MCS), Asst. Commissioner chu rawn tirin hemi hunah hian Chanmari Local Council, bialtu AMC Councillor Ward No.V, Pu Rosiamnggheta, Chanmari West Branch YMA hruaitute leh insatu Pu David Lalhmangaiha te nen an enho.

Pu David Lalhmangaiha hian a insak mekah hian sorkar phalna a la lo tih finfiah a ni a, a tuichhe paihna pawh a lang chinah mumal takin pipe hmang mah se, a hnu lawkah thlang lam tana hlauhawm thei turin a luang darh mai mai tih hmuh a ni bawh. Hemi ni pawh hian mi 10 chuang hnathawktu lo awmin an lo thawh mek bawh.

Hetiang hi thil awm dan a ni a,

Dr. Lalngura chuan insatu hnenah a insak mek chawhltir nghal turin thutlukna a siam mai thei lo va, thil awm dan a hmuhthe chu Aizawl DC leh Geology & Mineral Resources Department-ten an zir ho leh phawt a, joint survey an neih leh loh chuan titawp turin thutlukna a siam thei lo.

Chutih laiin a ranglama Department hotute nen survey a nih tur thu a sawi thung. AMC hmalak mekna a nih sa bakah chhunzawm lo tura thu an lo pek mek a ni bawh nen, AMC-ah a rang thei angah hma la turin Branch YMA chuan July ni 11 khan lehkhah a thehlut leh ta zawk a, veng tan a tha thei ang bera hna thawh a nih theih nan theihtawp chhuaha bawhzui zel a tum bawh.



Ni 6.7.2013 (Inrinni) tlai khan Sairang Road, N-Sect. huamchung dawr pakhatat Vanlalruati, Hunthar Veng hnen aţangin Mc Dowells um 12 man a ni a, tun hnua ti tawh lo tura zilh a nih hnuin zu hi leih buak vek a ni.

Ni 11.7.2013 (Ningani) zing khan Branch YMA-in AMC-a Zunin siamna kan hmuh aţanga Pu JC Thangpuia Vanapa Sect. in bula zun in tha tak, mipa leh hmeichhe zun theihna tur siam zawh tak chu Bialtu Councillor Ward No.VI Pi Zamanthangi'n a hawng a, zun in siam hna tha taka thawktu Vanapa Section chungah Branch YMA-in lawmthu a sawi.

Executive Member Pu Lalchhanhima (Puia) Silchara zin pawh a lo haw leh ta.

Ni 11.7.2013 (Ningani) zing khan Ui leh Ar pawn chhuak vai hnatlang neih a ni a, ui 4 leh ar 2 man a ni a, a neitute khul /chawitir an ni.

Branch Ex-Adviser Pu Roţhuama V-Sect. chu Aizawl SDO Sadar aţangin Printing & Stationery Deptt.-ah Dy. Controller hna chelhtur tih a ni a, Branch Executive Member lo ni thin Pu VL. Huma K-Sect. pawh ZIDCO Asst. Manager-ah kaisangin Lungleiah a hna thar hi a zawm fel.

Ni 16.7.2013 (Thawhle) zan hian Branch Executive Meeting koh tum a ni.

Branch YMA Zaipawl hla zir nan an in phal taka hmantirtu Branch Fin.Secy.Pu Lalrinliana leh Pi Charliani (N-sect) te chhungkaw chungah Branch-in lawmthu a sawi.



TUNKAR CHANGVAWN

"Thu ka pe che a ni lawm ni? Chak tak leh huai takin awm rawh; hlau suh la, zam hek suh; Lalpa i Pathian chu i kalna apianga'n i hnenah a awm zel dawn alawm" tiin a sawi a. *Josua 1:9*

Editorial Board

Editor:	R Lalrinngeta	9862358337
Joint Editor :	Lalchhandama	9862358347
	J Lalnangliana	9862399658
News Editor :	Thangkhuma	9862303135
	Lalchhuanmawia	9862580558
	K Lalremtuanga	9862119608
Cir. Manager :	Jacob Lalrinsanga	9612319779
Production Manager :	RL Thanhmun	9436152760

Branch Office Bearer

President	<i>C Lalarliana</i>	9436142049
Vice President	<i>K Darthantluanga</i>	9436196071
Secretary	<i>Zairemmawia</i>	9862385654
Asst. Secretary	<i>RL Thanhmun</i>	9436152760
Treasurer	<i>R. Lalhmachhuana</i>	9436151817
Fin. Secretary	<i>Lalrinliana</i>	9862581814
Adviser-te :	<i>Pu F Zosanga</i>	9436142106
	<i>Pu A Biaklawma</i>	9436363169
	<i>Pu Lalrengpuia Sailo</i>	9862075614

Editorial :

Kumin chu Mizoram pum huap intihsiakna lian tham tak tak hmachhawn tur kan nei nual mai. Heti ang hunah hian Chanmari West mi, YMA member kan nih anga kan tihtur kan hriat a tul hle mai. Kan thiehna a inchen vek kher lo vang, kan phak taw theuhah tang tlang ila, kan tanrualna chuan Chakna min pe ngei ang.

Thla leh maiah YMA Zaipawl intihsiak a awm dawn, kan Branch pawhin lawmman lak phak ngei tumin tan kan la mek, mipuite hian zaipawl tan hian tangkaina kan la nei ngei ang, chutih hunah chuan theih tawp i chhuah teh ang u.

September thla mai hian Hnam Lam hmanga intihsiakna kan hmachhawn dawn baw. Tunlai hian section hrang hrangah zir mek a ni a, YMA member, thalai awm zat atanga chhut chuan lam zir thin kan tlem hlawn hle mai. Tan kan lak deuh chu a ngai a ni.

Infiamna lamah MPL (Football) khel turin CWSC a inbuatsaih mek. Chhawm-dawl an tulna kawng a la awm ngei ang, chutih hunah chuan mi dangte tihtura dah mai lovin, veng chhung mi leh YMA member kan nih avangin tih ve tur kan nei tih i hre thar leh ang u. Tlem tlema kan thawh theuh hian hlawnthlinna rahbi min tuksak ngei dawn tih hriain kan phak tawkah i tang theuh ang u.

Tv Marina, Editorial Board-in kan lawmpuiin kan chhuang tak zet, a kal zelna turah duhsakna kan hlan baw e.

Article

Ka theih leh neih i tan ti ila

T-a

Beiseina nen kan thlir thin a, beisei ngam mang lovin kan awm fo tawh.

Kum 10 fe a vei hnuin dinhmun thaah kan awm a, a vawrtawp thleng tur meuh chuan keimahni kan inen a, insitna lian tak kan nei. Kan theihna kawh kan iai lo thei lo va, kan neih rosum a beitham si; lak luhna mumal kan nei lo a, mi hausa tak min tuamhlawn mai tur hmel kan hmu baw si lo.

Mahse, huaisen takin kan hruaituten hma an la a, miten an theih chu kan thei ang tih chu an thupui a ni. Kan thalaiten rilru sang leh rual elna tak tak an putna tur a ni a, ram pum huap khawthlir thar nei tura veng mipui kaihruai theihna leh chawikanna tur niin an hria.

Buana hmaa kherh ngawt an duh lo va; senso a tam si Mizoram Premier League khel thei turin tling mah ila club kan enkawl zo lo ang tih ngaih dan leh kan thei em em ang tih chu kum kal ta atanga tun thlengin a la insual tawk viau mai thei.

Infiamnaah hian miten an duhthusam thin, an beisei ngam loh an puitlin fo mai. Rilru chhungrila tumna tak tak an neihte tihlawhtling tura theihtawpa an beihna rah a ni ngei ang. Ban phak loh khawih tumin an bei a, rinna nung nen hma lam an pan talh talh thin.

Tunhnaia khawvel huap infiamnaa thil thleng pakhat lek sawi mai mai ila. Kar hnih kal ta khan kum thum dawn tlankawng pakhatna ni ngai tawh lo Yamaha rider

Valentino Rossi chu Dutch Grand Prix-ah pakhatna a ni a, wavi sarih lai MotoGP world champion ni thei hi a lawm uchuak kher mai.

Kum 34 mi Rossi hian a hnua a sawi leh dan chuan "wavi tam tak pakhatna hi ka ni leh thei tawh lo a ni anga tiin ka inngaihtuah hman," a ti. Tun pathianni tlaia Germany-a an tlan leh turah pawh chak thei a nihzia inhre chungin a tel dawn a, rilru leh thlarau thar nen a inlan dawn tih a sawi.

Kan sawi tum tak chu Mizorama football inelna sang berah kan veng kan tel tur hi a ni. Eng pawh ni se, kan hruaitute inhuamna a sang a, sum sen hautak lutuk karah kan veng tihmingtha turin an mawhphurhna an hlen chhuak ngei ngei dawn. Veng mipuite thlawpna tha an dawng a nih chuan ziaawm leh awlsam zawkin hmabak hautak an su tlang thei ang.

Tel ve hrim hrim ang tih lam an ngaihtuah lo. Sum avangin an duh ang player an nei lo na a, an neih angte tangkai taka hman tumin an bei a, club tantu mipuite tan mittlunga inlan ngei turin an inbuatsaih.

Mahse, a tha ber ni tur team kan nei nghal lovang tih a chiang a, a pawimawh ber phurna leh inrintawkna nei turin a thawhrimna phu ang thlawpna an mamawh. "Hei hian ka lo tang ve ang e" titu kan tam poh leh kan intinung tawn dawn tihna a ni a, chumi tur chuan mipuite an beisei a, inthlahrunna lian tak an neih avangin an sawi ring ngam lo.

Tlangval chhuanawm leh entawntlak

Zingkarah Chanchinbu sema inhlawn, Class kal loh nia inhlawnfa baw, in chung hna tul apiang thawh hreh nei ngai lo, kum 2013-a Mizoram University-in result a tihchhuahah B.A (Political Science)- a mark 572 hmu a, topper dinhmun thleng thei **Tv Lalrinngeta** hi a chhuanawmin a entawntlak tih loh rual a ni lo.

Lalrinngeta (Marina tia koh thin) hi May ni 10, 1992-ah Pu Lalrammuana leh Pi Zionpari te nupa karah a lo piang a, a naupanlai hun chu a pianna Biate kuaah a hmang. Gov't P/S-I, Gov't M/S-II leh Gov't Eastern High School (Biate) ah te zirna bulrawn tan chhoin, HSSLC-ah kum 2010 khan Biate HSS atangin Mizoram-ah 10-na (Arts-ah) a ni.

Marina hi lehkha thiam thei tak tia sawi tur a ni hnan lova, taimakna leh tumruhna nena tangkawpin tun dinhmun hi a thleng a

ni. B.A (Final) a zir lai hian zan dar 12 thlengte lehkha a chhiar a, zing dar 3-ah te lehkha zir turin a tho leh thin. Kohhran leh KTP rawngbawlnaah a phak ang tawkin a tel reng a, Inkhawm a ngai pawimawh hle. A hunawl zawng zawng chu lehkha zir nan leh in chung hna tul thawh nan a hmang thin.



Ama sawi danin "Heti ang dinhmun a thlen theih chhan ber chu a theih ang tawka a thawhrimna Pathianin mal a sawm a ni" Tunah hian Mizoram University-ah Master Degree zir chhunzawm a, Civil Service lama lut thei ngei tura inbuatsaih a tum bawka a ni. Heti ang mi Chanmari West Branch YMA-in member kan nei hi a ropuiin a chhuanawm tak zet a ni. Tunah hian Marina hi Vanapa Sect-ah a khawsa mek.

Chawngbawla Section

□ Ni 9.7.2013 (Thawhle) zan khan YMA Park-ah Section Wise hnam lam intihsiakna tur atan lam an zir a, member 50 chuangin lam an zir. Section YMA member leh YMA chhang member la zir ve lo te tan pawh zir theih zel a ni. Ni 16.7.2013 (Thawhle) zan dar 7-ah YMA Park-ah zir leh tur a ni.

□ Pu C Lalzarliana (Branch President) in lam zirna atan Tube Light lian chi 2 a hmantir a, an lawm hle. Tin, lam zir zawng zawng leh a zirtirtu te chungah lawmthu an sawi.

□ Chawngbawla Run (Section bungraw in) extend hna chu a chunglam an peih fel tawh a, a hnuai lam an chhunzawm leh mek.

□ Kuang duansa hun rei tak Pu R Thansanga (L) te ina an dah thin chu, Chawngbawla Runah an sawn thla tawh a, Pu R. Thansanga (L) te chhungkaw chungah an lawm hle.

□ Ni 13.7.2013 (Inrinni) khan Chawngbawla Run in hnuai siam hnatlang nilengin an nei.

□ An member Pu Lalrosanga Tlau chuan Mizoram Civil Services (Combined Competitive) Preliminary Examination a pal tlang a, an lawmpuiin an chhuang hle, a kal lehna zel turah duhsakna an hlan.

□ An hruaitu hlui Pu Lalrawngbawla Ralte chu a hnaah kaisangin, Divisional Accountant (Gazetted) in Kawrthah-ah a awm dawn. An lawmpui rualin a awm bosan dawn avangin an ui hle.

□ Bial vawngtute House No./Name Plate man, Chhiatni Fund, YMA AW man tifel thuai turin an inngen.

□ Section chhungah Silver Jubilee chhungtin te thawh lawm khawn mek a ni a, chhungtin te'n lo ngaipawimawh turin an inngen.

□ Silver Jubilee member te thawh lawm section chhungah khawn zawh a ni tawh a, Branch-ah ₹ 10,750/- thehluh a ni.

Khuangchera Section

□ Ni 6.7.2013 (Inrinni) khan YMA Run thuam that hnatlang an nei a, member thawkchhuak chungah lawmthu an sawi tak zet a ni.

□ Section Wise hnam lam intihsiakna tur atan ngawrh taka lam zir mek a ni. A tam thei angber lam zir zel turin an insawm.

□ Thahnem ngai taka lam zirtirtu - Tv. Lalhlimpuia, Tv. C. Lalawmpuia leh Nl. Zothanpuui te chungah lawmthu an sawi.

□ Ran chhuak vaia hnatlang neih thin tum a ni a, hruaitute hnatlang tura lo inring turin an inhriattir.

□ An member Tv. Lalrampaia S/o Lalthavunga (L), Assam Regiment- a a lut thei chu an lawmpui hle.

□ Lam zirte tana Theitui tum saktu Tv. Lalhmangaihliana leh Tv. Vanlaldika te chungah an lawm hle.

□ Hruaitute atangin heng mite hian BA an pass a, an lawmpui hle.

1. Tv. Lalhmangaihliana
2. Tv. C. Vanlalhriatpua
3. Tv. Vanlaldika

Neuva Section

□ Ni 9-12.7.2013 zan khan Leader's Directory zuarin an hnatlang a, member thawk chhuak zawng zawng chungah leh tlawmngaia lei saktute chungah an lawm hle.

□ Leader's Directory an siama hming leh Phone No. chhut sualte chungah ngaihdam an dil a. Pu J. Lalnangliana hming chhut sual leh Health Sub-Centre Health Worker Pi HK Rosangpuui Phone No. 9856634035 tih zawk tur a ni.

□ YMA Zawlbukah hnam lam zir thin a ni a. YMA member leh YMA chhang member a duh apiang tan zir theih a ni.

□ An hruaitu Tv. Vaninmawia'n B.A (P.A) tha taka a pass chu an lawmpui hle.

□ Section huam chhunga ualau taka Zu in emaw Damdawi (ruih chi) khawih leh zuar hmuh/man an nih chuan dim an tum lo va. A lo ti thin an awm a nih chuan hei hi

□ Ni 13.7.2013 (Inrinni) zing khan Pu H Lalrawna, V-Sect. leh Pi Vanlalnglaki, N-sect. te in inkara bawlhhlawh, insakna hnawmhnawk leh leivung an paih chuan Culvert a hnawh a, hnatlanga paih fai a ni. Bawlhhlawh paihtute hi hriat an ni a, an paih leh chuan YMA AW-ah an hming tarlan a ni ang.

Taitesena Section

□ CWBYMA President Pu C. Lalzarliana'n LIGHT lian tha tak mai a tul apianga hman atan a pek avangin a chungah an lawm hle.

□ Y.M.A AW Copy 269 man ₹ 21520 leh Silver Jubilee Fund member 563 hnena ₹ 20 khawn ₹ 11260 chu an khawnfel a, an thehluh kim tawh bawke.

□ Hnam lam zir thinte chungah lawmthu an sawi, la zir ve lote pawh inthlahrung hauh lova zir ve turin an insawm.

□ Silver Jubilee Fund chhungkaw tinin an thawh tur pawh khawn chhoh mek a ni.

□ Section huamchhunga B.A Pass tharte:

1. Lalrindiki D/o Lalrawngbawla
2. Lalpanpua S/o Lalthuamluaia
3. Baby Lalnunpuui D/o Lalthanzama
4. P.C Ramdinmawii D/o P.C Zarzoliana
5. Miriam Lalnunsiami C/o Lalbiaksiana Colney
6. Lalbiakzuali D/o H. Thangdailova

□ An hruaitu Pu C. Lalrosiama fanu Lalthamawii chu Zonet buatsaih CHHAM KUT-ah Final round a thleng thei a, an lawmpuiin chhuanawm an ti hle.

Vanapa Section

□ Ni 11.7.2013 zing khan Zun In hawanna neih a ni a, zun in siamna petu Pi Zamanthangi, Councillor chungah lawmthu an sawi.

□ Jubilee Fund, member tina ₹ 20 khawn tur chu an zo fel ta.

□ YMA Chanchinbu man (43 copies) pawh pek fel tawh a ni.

□ Chhiatni Fund khawn fel tawh a ni a, chhungtinte chungah lawmthu an sawi.

□ Heng mite hian B.A/B.Sc an pass a, an lawmpui hle.

- 1) Lalhlimpuii Pautu - B.Sc (Bot)
- 2) Lalringgheta - B.A (Pol.Sc), Topper
- 3) Jacinta Lalngaihzuai - B.A (Eng)
- 4) Mary Lallianzami - B.A (Edu)
- 5) Mary C Lalthazuai - B.A

□ Lam zirna atana in hmantir thin tu Pu K Rochungnunga leh Pu C Lalnunmawia te chhungkaw chungah an lawm hle.

□ Lam zir tura sawmna dawng zawng zawngte chu taima taka zir thin turin an insawm nawn leh.

□ Lam zirtir thintute Tv. Isak Vanlalpeka, Pu Henry Lalchhanhima leh Nl. Laldinpuui te chungah lawmthu an sawi.

□ Hruaitute lam zirnaa kal thin turin an inhriattir.



Vantlang Zun In - Vanapa Section

LUNGHLUROAD

☐ Ni 6.7.13 (Inrinni) khan an hnatlang a, mi 30 zet thawk chhuakin thawk chhuak zawng zawng te chungah lawmthu an sawi.

☐ Heng mite aţang hian ţanpuina dawn a ni.

Pu C Lalţanpuia - ₹ 200
Pu F Zohmingthanga - ₹ 100
Pu H Lalenga - ₹ 100
Pu Lalrammawia Khiangte - ₹500

☐ Pu F Lalrova leh Pu K Rosiama te'n tui in tur, kuhva leh kamram ţahnem tak an pe a, lawmthu an sawi.

MHIP

☐ MHIP Day vawi 39-na chu Chanmari West Middle School-ah ropui takin an hman. Member-te pawh an kal ţha hle a, NGO hrang hrang leh Local Council te'n an telpui avangin an lawm hle. Bungrua hmantirtu Neuva Section YMA leh Khuangchera Section YMA hnenah lawmthu an sawi. Chanmari West Middle School Headmaster leh Staff ten an School an hmantir avangin an lawm hle.

☐ Bialtu MLA Pu Lalthanzara'an MLA Fund aţangin ₹ 1,00,000 MHIP Building Sak chhunzawmna tur a pe chu an lawm hle. Hun remchang hmasaberah hmalak nghal an tum.

☐ Anganwadi Centre 4-ah electric Connection tih zawh fel a ni. Hma laksaktu Pu C Lalarliana (Adviser) leh Pu Thara hnenah lawmthu an sawi.

VOLLEYBALL

☐ MVA Season Opening Tournament khelh zawh takah Semi-Final an thleng a, veng mipui ţawiawm ţhintute chungah an lawm hle.

☐ Tournament khelhlaia Tv Lalduhawma inhliam chu pawh an ti hle, a dam leh thuai an duhsak.

☐ Tournament an khelh theih nana sum leh paia ţanpuitute chungah lawmthu an sawi.

- 1) Lalduhawma (T-sect) ₹ 5000
- 2) Lalchhandama Ralte (CH-sect)- ₹ 2000
- 3) F Zosanga (K-sect) - ₹ 500
- 4) Lalrinsanga (Terina, T-sect) - ₹ 1500
- 5) H Vanlalhruii (K-sect) - ₹ 200

☐ 2nd Div tan Season Opening Tournament thla thar aţangin khelh tur a ni a, Ni 15.7.2013 (Thawhţan) tlai dar 4:00-ah Player-te Indoor Stadium-ah practise ţan tur a ni e.

FOOTBALL

☐ Independence Day celebration Football Tournament atan an inbuatsaih mek, Ni 9.7.13 (Thawhlehi) aţang khan Training Camp neiin PTC Lungverh lamah an lut thla. Camp-naah hian an Chairman Pu H Lalramhluna'n a awmchilh.

☐ Camp-naa mamawh hruaitute aţangin hetiang hian thawkhawm a ni.

1. Pu H Lalramhluna - GAS bur 1
2. Pu K Lalhmachhuana - GAS bur 1
3. Pu Zothansang Tohhawng - BUHFAI bag 2 leh Sintex liter 1000 dawng
4. Pu Vanlalhluta - Tel case 1
5. Tv H Lalhmingmawia - Alu Bag 1
6. Pu Saitluanga Sailo - ₹ 2000
7. Tv Hmingthansanga - ₹ 2000
8. Pu Lalhmingliana (Puia) - Dal Bag 1.

☐ Camp-na hmuna player-te hruai nana motor hmantirtute Pu H Lalrinthanga, Pu H Lalchungnunga, Pu KC Gangte leh Pu M Sawmliana te chungah an lawm hle.

☐ Thawhlawm Ip thla tina khawn turin hruaitute hnenah sem chhuah a ni.

☐ 3rd Division registration chu ni 14.7.13 (Chawhni) thleng hawn a ni a, hemi hnu hi chuan inziah luh theih a ni tawh lo ang.

ZOFA

☐ An Secretary Pu Lalbiakhlua chuan fanu thar duhawm tak mai a nei a, an lawmpui hle.

☐ Club member-te mahni awmna Section ţeuhah lamzir ngai pawimawh turin an inngen.

☐ Tun thla tawp lam hian Rallu Lam film chan chhunzawm an tum a, a chang turte hun remchang lo insiam turin an hriattir.

Vaivakawn-ah heng Doctor Specialist thiam tak takte hi an ţhut hun kan rawn tarlan ang hian rawn theih an ni e.

1. Naupang Specialist (Paediatrician)
Tuesday, Thursdays & Friday - Morning : 7:00 - 8:30am
Saturday - Evening : 3:00 - 6:00pm
2. Orthopedic (Ruh leh tha) Specialist
Monday, Wednesday & Friday - Morning : 7:00 - 8:30am
3. Medicine Specialist
Tuesday, Thursday & Saturday - Morning : 7:00 - 8:30am

(2-1) Proprietor
V. Lalruatpuii

SPORTING CLUB

☐ Ni 12.7.13 Zirtawpni khan an hruaitu ten Bialtu MLA Pu Lalthanzara an hmu a, a ni hian ţanpui an ngaihnaah ţanpui a inhuam thu leh hmalakpui ngei a tum thu a lo hirih.

☐ LC-in vengchungah vehburkhawn an phalsak avangin an lawm hle. Vengchungapawl tin leh chhungkaw tinte thawh pui turin an sawm.

☐ CWFC te ₹ 30,000 laia Sponsored tu BETHEL ELECTRONICS, Upa L Romawia(L) te chhungkaw chungah an lawm hle.

Awm thar

1. Pu Lalthapuiate chung member 4, Edenthara aţangin Pu Hminga (L) in Neuva Section- ah.

2. Pu VS. Mathew-te chung member 9, Electric Veng aţangin anmahni in V-Sect. Char tuikhur bulah.

3. Pi Rintluangi te chung member 2, Zonuam aţangin Pu Vanlalrova in T-Sect.ah.

Pem

Pu R Lalthazualate chung member 5, Pu R. Pakunga in Vanapa Sect. aţangin Zonuam ah.

Electoral Roll Revision Hearing

Ni 19.7.2013 (Zirtawp) tlai dar 2:00 hian Chanmari West Indoor Stadium-ah Electoral Roll Special Summary Revision Hearing neiin tur a ni a, hemi hunah hian Roll-a awm thar duh leh transfer duhte chu mahni inlan ngei tur a ni. Electoral Roll-a awm thar dilte chuan Birth Certificate (original) ken tur a ni a, Transfer dilte chuan Voters ID ken tur a ni e.

PROPERTY

☐ Ni 13.7.13 Inrinni khan Park chei hnatlang neiin a ni. Park hi uluk taka chei chhoh zel a ni.

☐ Information Mike siam ngailaite siam mek zel a ni, siamţhat ngai a awm chuan Property Sub-Committee Chairman hnenah hriattir tur a ni.

KEIMAHNI

☐ Tv Zaita (Branch Secy) leh Tv Lawma (Thalai Entu) te'n a tawp thlengin min awmpui a, kan lawm hle.

☐ Joint Editor, Pu Chda erawh a fapa dam loh vangin a rawn lang lo, pawh kan ti hle, an dam leh thuai kan duhsak e.